

四庫全書

史部

欽定四庫全書

史部

北河紀卷四至六

詳校官監察御史臣周元良

刑部郎中臣許兆椿覆勘

總校官進士臣朱鈐

校對官待詔臣胡士震

謄錄監生臣吳貽棟

欽定四庫全書

北河紀卷四

河防紀

明 謝肇淛 撰

河之源其最微者莫若會通黃水衝之則隨而他奔而漕不行故壩以障其入源微而支分則其流益少而漕亦不行故壩以障其出流駛而不積則涸故閉閘以須其盈盈而啟之以次而進漕乃可通潦溢而不洩必潰

於是有減水閘溢而減河以入湖涸而放湖以入河於是
有水櫃櫃者蓄也湖之別名也而壅水為埭謂之堰
沙解之處謂之淺淺有鋪鋪有夫以時挑濬此則衛河
亦有之矣

由沛縣入魚臺境為閘者二曰利建即宋家口嘉靖四
十五年建月河長七十五丈迤北十八里曰南陽元至
順二年建月河長三十五丈宣德七年重脩減水閘十
四俱隆慶二年建以洩新河水入南陽湖者也壩一曰

南陽隆慶元年建淺鋪二十一湖一曰獨山即南陽湖
隆慶元年北岸築石隄三十餘里

舊運河在昭陽湖西為閘者三曰孟陽泊在縣治東元
大德八年建月河長十二丈迤北八里曰八里灣宣德
八年建月河長二十七丈又北八里曰穀亭元至順二
年建月河長五十八丈積水閘二壩一今皆廢淺二十
一

由魚臺而北達於濟寧其東岸鄒縣境也為小閘一成

化十年建淺一曰塔里

由鄒而北入濟寧境自州以西則濟寧衛分地也為閘
十四曰棗林距南陽十二里元延祐五年建月河長八
十丈正德二年重脩迤北六里曰魯橋永樂十三年建
正德二年重脩月河長一千一百六十五丈在河西岸
隆慶四年改為正河又北五里曰師家莊元大德二年
建月河長四十丈又北十五里曰仲家淺宣德五年建
月河長五十一丈萬歷十二年重脩又北五里曰新閘

元至正元年建月河長五十一丈又北八里曰新店元
大德元年建月河長五十一丈嘉靖十四年重脩又北
十八里曰石佛元延祐六年建掘土中得石佛像十二
故名月河長七十九丈弘治六年重脩又北八里曰趙
村元至正七年建月河長九十八丈弘治十二年重脩
又西北三里曰在城元大德七年建弘治十二年重脩
又西北一里曰天井元至治元年建一云唐尉遲敬德
所創也其西南曰分水元大德五年建月河閘三上下

二閘俱天順三年改建曰下新即在城月河曰中新至上新一里成化十一年建曰上新即天井月河減水閘六新店新閘仲家淺各一屬州五里營十里鋪安居鎮各一屬衛萬歷十七年建壩一曰趙村月河石壩弘治初建淺十七曰硯瓦溝曰棗林曰魯橋曰師家莊下曰師家莊上曰仲家淺曰新閘曰新店曰花家曰石佛曰楊灣曰趙村曰五里曰十里曰安居曰永通曰曹井橋湖一曰馬場一名任湖在五里東周圍四十里上受獨

山湖之水

起魚臺至濟寧有舊運道焉有閘四曰廣運上弘治四年建曰廣運曰永通下成化十一年建曰永通洪武四
年建今俱廢淺二十

由濟寧而北其左為鉅野有閘一曰通濟距天井三十
五里萬歷十六年建月河長七十二丈壩一曰蓬子山
一名彭祖上壩成化四年築淺五曰火頭灣曰梁家口
曰白嘴兒曰小長溝曰黃沙

由鉅野而北其左為嘉祥有減水閘六壩一淺四曰大長溝曰十字河曰寺前曰孫村

由嘉祥而北為汶上境有閘五曰寺前距通濟三十五里正德元年建迤北十五里曰南旺上一名柳林閘又北九里曰南旺下俱成化六年建又北十五里曰開河元至正間建永樂九年重脩月河長一百二十六丈又北十二里曰袁家口正德元年建月河長九十九丈月河閘二在南旺上下成化間建減水閘九曰焦嶽曰盛

進曰張全曰劉玄曰孫強曰彭室曰常名曰關家大曰
兼濟壩一曰五里鋪滾水石壩在河西岸萬歷十七年
建淺十四曰南界首曰石口曰柳隄曰南旺曰鵝河口
曰田家口曰關城曰開河曰劉家口曰袁家口曰關家
口曰張八老口曰步家口曰北界首湖一曰南旺在漕
河兩涯周圍百八十里中為二長隄漕渠貫其中嘉靖
二十二年重脩其中畫為三在漕渠之西者曰西湖縈
迴九十三里成化四年始砌石隄嘉靖二十二年重脩

萬歷十七年加築舊隄一萬二千餘丈添築東面子隄一千二百餘丈其東曰蜀山湖周廻六十五里嘉靖二十年創築東隄萬歷二十五年重脩曰馬踏湖周廻三十四里萬歷十七年築隄三千二百丈

由汶上而北入東平境有閘三曰靳家口距袁家口十八里正德十二年建月河長一百八十四丈迤北三十里曰安山成化十八年建又北三十里曰戴家廟嘉靖十六年建洩水閘一曰金線在戴家廟北景泰五年建

湖口閘二北曰似蛇溝南曰八里灣萬歷二十二年建
壩二曰戴家壩至州六十里永樂九年建曰坎河口石
壩萬歷十七年建淺十七曰沙堆曰邢家莊曰蘇家莊
曰譚家莊曰安山上曰安山下曰積水湖曰馮家莊曰
劉家莊曰李家莊曰王仲口曰果家莊曰靳家口曰戴
家廟曰韓家口曰張長口曰劉家口

由東平而北入壽張縣境有積水閘二曰沙灣閘成化
七年建曰高口閘堰一曰野豬腦縈迴三十餘里淺五

曰戴家廟下曰劉家口曰戴洋口曰沙灣曰張家莊
由壽張而北入東阿縣境有閘一曰通源在張秋城南
運河西岸即廣濟渠也景泰四年徐有貞治沙灣決河
先為疏水之渠起張秋金隄通壽張之沙河西南至於
竹口又西南至大渚潭乃踰范暨濮而上又西北接河
沁之水命曰廣濟渠渠口為通源閘有石隄二道自大
感應廟起至沙灣長一百六十丈天順八年脩創自沙
灣起至荆門驛長一千九百三丈有五空橋在張秋城

南與沙灣相對即減水石壩廣袤各十五丈又於上甃石為五竇以漕渠餘水入之小鹽河弘治四年建淺八曰掛劍曰新添曰沙灣曰北灣曰安家口曰仲渡口曰南浮橋曰北浮橋

由東阿而北入陽穀縣境有閘六在張秋北十里曰荆門上又北三里曰荆門下又北十里曰阿城上又北三里曰阿城下又北十二里曰七級上又北三里曰七級下皆元時建永樂間脩淺十曰何家口東岸曰何家口

西岸曰館驛灣東岸曰館驛灣西岸曰張家口曰秦家口曰劉家口曰義河口曰官窰口曰渡口

由聊城縣東岸北至博平縣境西岸北至堂邑縣境有閘四曰周家店距七級十二里元大德四年建迤北十二里曰李海務元元貞二年建又北二十里曰通濟橋又北二十五里曰永通俱永樂十六年建減水閘四淺鋪二十三曰北壩口曰徐家口曰柳行口曰房家口曰呂家灣曰龍灣曰宋家口曰破閘口曰林家口曰于家

口曰周家店曰北壩口曰稍張閘曰柳行口曰白廟曰
雙隄曰裴家口曰方家口曰李家口曰米家口曰耿家
口曰蔡家口曰官窪口

聊城西岸南自龍灣鋪北至西北壩鋪平山東昌二衛
分地也有淺二曰中淺曰小淺

由博平縣北至清平縣境有減水閘一淺鋪六曰朱家
灣曰老隄頭曰南減水閘曰袁家灣曰朱家屯曰梭隄
由堂邑縣北至清平縣境有閘二曰梁家鄉距通濟三

十里宣德四年建迤北十五里曰土橋成化七年建減水閘三曰函谷洞曰土橋曰梁家鄉淺七曰函谷洞曰土橋曰中閘口曰馬家灣曰北梁家鄉曰新開口曰南梁家鄉

由清平縣北至臨清州境有閘一曰戴家灣距土橋四十八里成化元年建減水閘二曰魏家灣曰李家口東岸淺鋪八曰朱家曰張家曰十里井曰趙官屯曰戴家曰陳官屯曰趙家曰潘家橋西岸淺鋪六曰張家曰李

家曰李官屯曰王官屯曰丁家屯曰魏家灣

河自衛輝來者歷館陶縣至臨清與會通河合流而北
其淺鋪十二曰灘尚曰窩兒頭曰遷隄曰秤勾灣曰小
馬頭曰南館陶曰安靖曰黃花臺曰李家曰馬頭曰馬
欄廠曰尖冢

由臨清州東岸北至夏津縣境有閘二曰新開上距戴
家灣三十里迤北五里曰南板俱永樂十五年建淺鋪
五曰弔馬橋曰房村廠曰上口曰丁家馬頭曰下杖柳

西岸北至清河縣境有淺鋪八曰尖冢曰白廟曰羅家
曰孟家曰趙家曰郭家曰陳家曰王家南岸西至板開
口有淺鋪六曰潘家屯曰七里墩曰潘家橋曰新莊曰
沙灣曰開口

由清河縣西岸北至夏津縣境有淺鋪八曰二哥營曰
嚴家曰吳家曰孫家曰葡萄曰草廟曰黃家曰賈家
由夏津縣北至武城縣境有淺鋪六曰新開口曰草廟
曰郝家曰小口子曰大口子曰橫河

由武城縣東岸北至恩縣境有淺鋪十三曰商家曰白龍曰白家曰大龍曰灣頭曰柳林曰大還曰高家曰陳家曰何家曰半邊店曰陳家曰方遷西岸北至故城縣境有淺鋪十二曰劉家曰侯家曰周家曰南調嘴曰北調嘴曰絕河曰西關曰小流曰孟家曰王家曰張家曰果子

由恩縣東岸北至德州境有淺鋪七曰白馬廟曰高師姑曰滕家口曰回龍廟曰八里堂曰新開口曰曹家口

而回龍廟之北有丁官屯一鋪德州衛地也有減水閘
一在四女樹

由故城縣西岸北至德州衛境有淺鋪四曰鄭家口曰
范家園曰焦姑寺曰孟家灣

由德州東岸北至德州左衛境有淺鋪三曰新窰口曰
飲牛口曰耿家灣

由德州衛西岸北至德州境有淺鋪一曰南陽務

由德州西岸北至德州左衛境有淺鋪三曰上八里曰

蔡張成曰劉皮口

由德州左衛東西岸俱北至德州境有淺鋪四曰小西門曰鄭家口曰四里屯曰下八里屯

由德州衛東岸北至吳橋縣境西岸北至景州境有淺鋪九曰張家灣曰圓窩口曰五里莊曰降民口曰丁官屯曰劉官屯曰四里屯曰八里屯曰高官廠

由景州西岸北至吳橋縣境有淺鋪四曰羅家口曰薄皮口曰坡唐口曰狼家口

由吳橋縣東西岸俱北至東光縣境有淺鋪七曰降民
屯曰鐵河圈曰朱官屯曰小馬營曰郭家圈曰三里曰
王家

由東光縣東岸北至南皮縣境有淺鋪四曰下口曰李
家曰任家曰狼拾西岸北至交河縣境有淺鋪五曰古
隄曰大龍曰桑園曰油房曰白家而二縣之界有潘陽
衛地焉

由南皮縣東岸北至天津右衛境有淺鋪五曰北下口

曰白家堰曰雙堂曰三角隄曰馮家口

由交河縣西岸北至青縣境有淺鋪五曰李道灣曰丁家口曰大流口曰菱角窩曰白洋橋而其中三十八里屬河間衛

由天津右衛東岸北至滄州境有淺鋪四曰小白洋橋曰大白洋橋曰南楊家口曰北楊家口

由滄州東岸北至天津左衛境有淺鋪七曰瓢河南口曰王家園曰寇家園曰回回灣曰紅孩兒口曰華嚴口

曰朱家墳口

由天津左衛東岸北至興濟縣境有淺鋪九曰張家口
曰大掃灣曰高家馬頭曰安都寨曰索家馬頭曰北橫
隄曰南橫隄曰許家淺曰南絕隄

由興濟縣東岸北至天津衛境有淺鋪七曰安都寨口
曰王家曰流洪曰安家曰柳巷口曰李家曰八里堂

由青縣西岸北至靜海縣境有淺鋪六曰甌河曰運坊
曰李家曰留小曰流河曰新莊口而甌河之北運坊之

南天津左衛境也有淺鋪五曰流佛寺曰北絕隄曰管莊口曰蓮花曰石堂

由天津衛東岸北至靜海縣境有淺鋪九曰泊漲曰新莊曰寨里曰東漫撒曰馬濟曰王家曰李家曰呂家曰蔡家而新莊之北三里霸州分地也有淺曰蘇家

由靜海縣東岸北至天津右衛境西岸北至武清縣境有淺鋪八曰釣臺曰雙堂曰在城曰獨流曰沙窩曰辛口曰楊柳青曰稍直口

創建魚臺孟陽薄石牖記略

牖即閘

元趙文昌

聖元以神武定天下遐邇率職來享來庭而江淮漕運商旅之轉販仕宦之往來非舟楫無以濟不通此會通河之所以作也河功告成于今幾二十年歲月滋久霖潦浸淫岸移谷遷不無堙塞都水監上下巡視求其利病以沛縣之金溝沽頭魚臺之孟陽薄沙深水淺地形峻急皆不能舟楫遇有官物往來必驅率瀕河之民推之

挽之者不下千餘妨農動衆民恒苦之遂條陳其事都
省委右司都事王潛都水太監馬之貞等臨視與所說
合議曰夫水積之不厚不足以負大舟蓄之不廣不足
以供下洩今莫若立堰以積水立牒以通舟堰貴長牒
貴堅漲水時至使漫流於其上如斯而已矣於是視地
之高下程廣狹量淺深繪圖計工以報都省議修之從
孟陽薄始今值歲晚先辦物料興工以春首為期用夫
匠一千二百三十二名監夫不足於近邑差雇五百七

十一名就給工價米糧一切物料官為和買給中統鈔五萬五千緡不敷於濟寧路官錢內支選差覆實司提舉仇銳來董是役預辦所需金石材木諸物指分工役其堰橫長一十二丈中為牖門外石內甃高一丈四尺基縱廣八丈牖下廣五丈殺之如壇級以及於上五分廣之三起於大德八年正月訖于五月凡用工二十七萬六千九百九十中統鈔十萬三千三百五十緡糧一千二百四十七石落成之日鼓聲四起牖門啟鑰篙師

序次以進前旗一指通數十百艘於飲食談笑之頃乃命謝里高立不遠千里而來請文至再予不撥因記脩牋之歲月如此

兗州重修金口閘記

劉德智

皇元膺天命撫方夏極天地之覆載皆臣服唯謹東南去京師萬里粟米絲枲織縞貝錦象犀羽毛金珠琨蕩之貢視四方尤繁重車輓陸運民甚苦之至元中穿會通河引泗汶會漳以達于幽由是天下利于轉輸泗之

源會雩於堯之東門其東多大山水潦暴至漫為民患
職水者訪其利病隄土以防其溢束石以洩其流其一
洞歲久石摧不足以吞吐今近北改作二洞以開啟閉
中書省以聞天子可其議命下之日當延祐四年都水
太監闊開分治山東寬勤恪恭敏於事會曹掾王元從
理簿書壕寨官李克溫董工役役長張聚李林路詳宋
寶秦澤分任其事夫匠一千九十石二千五百軌三萬
灰五萬木六千四百鐵錠鐵鉤鐵環不數取諸官錢以

買兗州知州尋敬提調州吏鹿果經始於四年閏正月
成於三月工告訖大祠玄冥醜酒割牲燔燎瘞埋吹擊
笙鼓風日清明役徒謳歌人神懽悅乃相與請辭鑱諸
石以紀其始終遂以命德智洪惟皇元起漠北以深仁
厚德奄有天下公家世鼎鼎參贊化育今誠能實於已
而勤於官忠於上而信於下言不妄發事不輕改故民
易信而功易成雖然又豈水曹為然推此誠實以理天
下則被澤溥矣辭不獲命因書所聞以為記

重脩濟州任城東牖記

俞時中

至元二十年朝廷初以江淮水運不通乃命前兵部尚書李興魯赤等調丁夫給庸糧自濟州任城委曲開穿河渠導洸汶泗水由安民山至東阿三百餘里以通轉漕然地勢有高下水流有緩急故不能無阻艱之患二十一年有司創為石牖者八各置守卒春秋觀水之漲落以時啟閉雖歲或亢暘而利足以濟舟楫惟是任城閘東距師家莊袤六十里土壤疏惡霖潦灌注承乏

歲月至是始壞時都水少監分都水監事石抹奉議適膺其任聞之中書省易而新之陶土為甃採石於山其材用所須不費於官不取於民率指役夫為之不數月厥功告成仍即其地之西偏脩飾廳事以為使者往來休憩之所公退因錄其同事者職役姓氏俾刻諸石以告後之來者

重修濟寧州會源牐記

揭傒斯

豐城人侍讀學士

皇帝元年夏六月都水丞張侯改作濟州會源閘成明

年春二月具功狀遣其屬孟思敬至京師請文勒石惟我元受命定鼎幽薊經國體民綏和四海辨方物以定貢賦穿河渠以逸漕度乃改任城縣為濟州以臨齊魯之交據燕吳之衝導汶泗以會其源置閘以分其流西北至安民山入于新河逮于臨清地降九十尺為牐十六以達于漳南至沽頭地降百十有六尺為牐十又南入于河北至奉符為牐一以節汶水東北至兗州為牐一以節泗水而會源之牐制于其中歲益久政日弛弊

日滋漕度用弗時先皇帝以為憂延祐六年冬詔以侯
分治東阿始脩復舊政誕布新令嚴暴橫之禁杜姦利
之門南䟽北導靡所寧處明年冬以及期請代弗許行
視濟腴峻怒狠悍歲數壞舟楫土崩石泐岌不可持乃
伐石區里之山轉木淮海之濱度工即功大改作焉明
年皇帝建元至治三月甲戌朔侯朝至于河上率徒相
宜導水東行竭其上下而竭其中以儲衆材撤故閘夷
坳泓徙其南二十尺降七尺以為基其下植巨栗如列

星貫以長松實以白石槩視其地無有所罅漏衡五十尺縱百六十尺八分其縱四為門縱餘其南之三北之一以敵水之奔突震蕩五分其衡二為門容折其三以為兩墉四分其容去其一以為門崇廉其中而翼其外以附于防三分門縱門于北之二以為門中夾附石鑿以納懸板五分門崇去其一以為鑿崇翼之外更為石防以禦水之洄洑衡薄縱皆二百三十尺爰琢爰甃犬牙相入苴以白麻固以石膠磨礪剗礪闕以勁鐵厓削

砥平混如天成冠以飛梁偃如卧虹越六月十有三日
乙卯訖功大會羣屬宴于河上以落之工徒咸在旄倪
四集酒舉樂作揮鍤決塢艤櫂啟鑰水平舟行伐鼓譟
呼進退間暇其稱侯之功頌侯之德者雷動雲合且拜
曰惟聖天子繼志述事不易任以成厥功惟億萬年享
天之休是役也以工計石百六十人木十人金五人土
五人徒千四百二十人以材計木萬一百四十有一石
五千一百二十有八其廣厚皆倍於舊甃二億一千一

百有五十以斤計鐵二萬五千五百麻二千三百石之
灰三億三萬三百三十有四以石計粟千二百有五十
視他牖三之視故牖倍之其出于縣官者鐵若麻木十
之七石五之一粟五之三餘一以便宜調度不以煩民
此其大較也初侯至之明年凡河之隘者闢之壅者滌
之決者塞之拔其藻荇使舟無所碍禁其芻牧使防有
所固隆其防而廣其址脩其石之巖陀穿漏者築其壞
之䟽惡者延袤羸七百里防之外增為長隄以閑暴漲

而河以安流潛為石竇以納積潦而瀕河三郡之田民
皆得耕種又募民采馬蘭之實種之新河兩涯以錮其
潰沙北自臨清南至彭城東至於陪尾絕者通之鬱者
澌之為杠九十有八為梁五十有八而挽舟之道無不
夷矣乃建分司及會源石佛師莊三牌之署以嚴官守
樹河伯龍君祠八故都水少監馬之貞兵部尚書李興
魯赤中書斷事官忙速祠三以迎休報勞凡河之所經
歲藏水以待渴者種樹以待休者遇流殍則男女異廕

之餓者為粥以食之死而藏饑而活者歲數千人是以
上知其忠下信其令用克果於茲役也侯亦勤且能矣
侯名仲彬河南人銘曰昔在至元惟忠武王自南還歸
請開河渠自魯涉齊以達京師河渠既成四海率從萬
世是資朝飢夕橋垂四十年孰漫而墮翼翼張侯受命
仁宗號令風馳徵工發徒既滌既疏濟閭攸基先難而
興既星而休觸冒炎曦疾者藥之死者槥之奚有渴饑
拊循勞徠信賞必罰勿亟勿遲十旬之間適績于成智

罔或遺洋洋河流中有行舟若遵大達舳艫相銜罔敢
後先亦罔敢稽賢王才侯自北自南顧盼嗟咨曰惟京
師為天下本本隆則固惟帝世祖既有南土河渠是務
四方之共于千萬里如出跬步聖繼明承命官選材惟
侯之遇昔者舟行日不數里今以百數昔者舟行歲不
數萬今以億慮惟公乃明惟勇乃成惟廉則恕汶泗之
會有截其牖有莠其樹功在國家名在天下永世是度
都水監創建穀亭石閘記 周汝霖

至順二年歲在辛未季夏之月會通河穀亭石閘成凡
用工九十日金石土木之工百有八十人徒八百二十
人石以塊計者二千七百三十木以株計者一萬二百
七十甃以口計者二十五萬三千灰以斤計者三十三
萬五千鐵亦以斤計者三萬一千四百其餘麻象鈺甌
斧錯瑣細覲縷各若干除金木糧儲出於有司他皆監
司採煉陶冶仍資傭工錢二萬五千緡開身縱二丈又
七尺衡二丈又二尺高如之鴈翅四各亘五十尺址表

八十尺廣百又二十尺奉直大夫都水監丞阿里公命
汝霖作文以紀之詞曰欽惟聖元混一區夏定鼎幽薊
九州内外罔不臣順航四海泛九江浮于淮入于河職
貢糧運商旅懋遷以供給京師然自東阿抵臨清二百
餘里舍舟從陸車輓以進御河每值夏秋霖雨泥淖馬
瘠車僨公私病之至元二十六年朝廷用令史邊君同
知馬公言開會通漕河自安民山引汶泗洸等水屬之
御河度其地勢穹下前後建石閘三十餘座以制蓄洩

於是川途無壅舟楫憧憧方諸陸運利相十百以故國
用充而民不匱四十年于茲矣惟棗林至孟陽薄七十
餘里湍激迅瀆沙土遺沔閘再啟鑰舟方一游嘉議大
夫都水盧公因壕寨楊溫等議宜於穀亭北郵傳西創
建石閘滙黃良艾河等泉以厚水勢則免齟齬之患詢
謀僉同乃上之省堂允請令下之日奉議大夫少監德
安帥寮屬董其事未幾會監丞阿里馳驛分治山東下
車之初首以斯閘為已任指畫夫匠親臨監督靡憚晨

久分任其事公威嚴謹恪寬以濟猛人皆獻力惟恐弗逮故能克底厥功經始於是歲之二月訖功於六月中樹巨闥傍羅釳砌龍鱗錯落鴈翼疊飛冠以虹梁縣以金鉤周綴縝密混若天成於是割牲醺酒祠河伯會羣屬於河上以落之舉酒作樂伐鼓啟鑰水平舟行颿檣翳空舳艫相接進退閒暇莫不歡喜歌詠噫是役也始則盧公建言之力中則德安公經營之勤終則阿里公踵成之功於國於民永賴以濟於斯見聖朝人才之盛

守職者不苟祿而勤於效忠矣因撫其所聞而為之記

改作東大閘記略

李惟明

泗別於滋陽克道之汶支於奉符之堽城洸引之西南
會於任城會通河受之昔汶不通洸國初歲丁巳奉符
畢輔國請於嚴東平始於汶水之陰堽城之左作一斗
門竭汶水入洸至任城益泗漕以餉宿蘄戍邊之衆且
以溉濟兗間田汶由是有南入泗淮之派至元二十年
朝議以轉漕弗便迺自任城開河分汶水西北流至須

城之安民山以入清濟故瀆通江淮漕至東阿由東阿
陸轉僅二百里抵臨清下漳御輸京師二十六年又自
安民山穿渠北至臨清引汶絕濟直屬漳御由是江淮
之漕浮汶泗徑達臨清而商旅懋遷游宦往來暨閩粵
交廣邛僊川蜀航海諸番凡貢篚之入莫不由是而達
因錫河名曰會通於是汶之利被南北矣始輔國直堽
城西北隅作石斗門一後都水少監馬之貞又於其東
作雙虹懸門閘虹相連屬分受汶水既又以虹石水易

圮迺改其西虹為今閘制通謂之東閘謂國輔所作斗
門為西閘西閘後改作址高水不能入獨東閘受水汶
水盈縮不常歲常以秋分役丁夫採薪積沙於二閘左
絕汶作堰約汶水三之二入洸至春全竭餘波以入霖
潦時至慮其衝突則堅閉二閘不聽其入水至徑壞堰
而西循故道入海故汶之堰歲脩延祐五年改作石堰
五月堰成六月為水所壞水退亂石齟齬壅沙河底增
高自是水歲溢為害至元四年秋七月大水潰東閘突

入洸河兩河罹其害而洸亦為沙所塞非復舊河矣初
之貞為沙堰也有言作石堰可歲省勞民之貞曰漢曹
參作興原山河石棚常為漲水所壞時復脩之汶魯之
大川底沙深濶若脩石堰須高水平五尺方可行水沙
漲淤平與無堰同河底填高必溢為害况河上廣石材
不勝用縱竭力作成漲濤懸注傾敗可待晉杜預作沙
堰於宛陽竭白水溉田闕則補之雖屢勞民終無水害
固知川之不可塞也且曰後人勿聽浮議妄興石堰終

困其民壅遏漲水大為民害重修堽城閘因自作記勒其言于石至是果如其言若合符契閘壞岸崩碑沉於水為土石所壓是年九月都水監馬元公來治會通河行視至堽城謂衆曰堽城洸汶之交會通之喉襟閘壞河塞上源要害役有先於此者乎於是用前監丞沈溫公闢為一大閘之議命壕寨官梁仲祥李讓計徒庸度材用量事期以狀上中書即從其請明年二月命工入山取石煨灰市物於有司經營揆度畫圖指示以舊址

弊於屢作改卜地於其東掘地及泉降汶河底四尺順水性也袤其南北為尺百廣其東西為尺八十下於平地為尺二十有二土木之工又入其下八尺上為石基以承閘閘之崇於地平自基以上縮掘地之深一尺兩壁直南北為身皆長五十尺其南張兩翼為鴈翅皆長四十五尺其北矩折以東西各附於其旁亦長四十五尺不為兩翼歛其前隘漲水也前盡基肩岸受水欲其前也後遜基八之一疊石為岸承之出基之高五尺長

為尺二十有五五分基之廣濶其中之一為明入明三分深之一為金口廣尺深咫尺十有三方盈金口之廣長亘明入金口兩端各盡其深上下以啟閉者十二其一不動為闕其大石為兩臬夾制其前卻石相疊比則以鐵沙磨其際必脗合無間後已凡用石大小以段計二千六十有奇自方以尺計三萬三千六百五十甃以萬計一十有六石灰以斤計四十六萬三千九百礫以擔計二萬四千木大小以株計一萬三百一十鐵剛柔以

斤計三萬九百一十五麻炭諸物稱是糜錢一萬七千
餘緡役徒千人木石之工二百八十人始事於五月七
日畢役於九月十日閘既成衆合辭請公願識其事于
是屬筆于予予復之曰汶古名川昔畢公馬公用之則
為轉漕之益為溉灌之利後人用之則有橫潰之憂有
墊溺之患水性非異今昔蓋用之善不善也馬公既善
用之又碑其言以示來者其慮後也深矣不有茲役曷
驗馬公之言碑仆於水豈天惡馬公發其機耶將使後人

獨受其害而不蒙利耶惟是役也雨暘時若漕運無愆
天其或者悔惡於人俾憶馬公之言乎既不獲辭遂為
叙導汶始末會通源委以見堰城閘水利喉襟且表出
馬公之言以為鑒又因以識興造年月脩閘之制度用
物之會計附焉公字仲彬唐古氏

會通河黃棟林新牒記

楚惟善

會通河導汶泗北絕濟合漳南復泗水故道入于河自
漳抵河表千里分流地峻散渙不能負舟前後置牒若

沙河若穀亭者十三新店至師氏莊猶淺澀有難處每
漕船至此上下畢力終日叫號進寸退尺必資車於陸
而運始達議立牀久不決都水監丞也先不華分治東
平之明年思緝熙前功以紓民力慨然以興作為已任
乃躬相地宜黃棟林適居二牀間遂即其地庀徒歲事
經始於至正改元春二月己丑訖工於夏五月辛酉牀
基深常有四尺廣三其深有六尺長視廣又尋有七尺
牀身長三分基之一崇弱五寸不及身之半又於東岸

創河神祠西岸創公署為屋以間計者十有五署南為
臺構亭其上凡用石方尺長丈為塊計三千有奇木大
小以株計四千六百五十八壘以斤計二十五萬鐵以
斤計一萬六千有奇甍一十五萬二千五百麻炭等物
稱是工匠繇卒千八十有五人用糧千七百五十斛楮
幣四萬緡制度纖悉備極精緻落成之日毋無留行役
者忘勞居者聚觀往來者懽忭稱慶僚佐耆宿衆相與
謀謂不伐石以識無以彰公之勤且懼來者之功不繼

而前功遂隳也先是民役於河凡大興作率有既廩為
常制是役將興時適薦饑公因預期遣官赴都稟命冀
得請俾貧窶者得竄其身藉以有養及久未獲命不忍
坐視斯民餓且殍遂出公帑人貸錢二千緡約來春入
役還官無何糧亦至民爭趨令其軫民瘼如此又初開
月河於河東岸闢地及咫礪礪錯出舉錡無所施迨營
牐基近西數舉武黃壤及泉訖無留礙雖國家洪福所
致抑公精誠感格天地鬼神亦陰有以相之也公哈刺

乞台氏明敏果斷操守絕人讀書一過目輒不忘律學
醫方靡不精究始由近侍三轉官受今除是役也董工
於其所者令史李中壕寨官薛源政奏差韓也先不華
工師徒長不能備載具列碑陰

新建耐牢坡石閘記

劉大昕

濟寧府同知

大明受命皇帝即位之元年詔遣大將軍定山東平幽
冀兵不血刃而梁晉關陝大小郡邑悉皆附順分兵戍
以守阨塞浚河渠以逸漕度舳舻千里魚貫畢聯貢賦

供需有程無阻後以黃河變易濟寧之南陽西暨周村
涯淤窒壅數壞舟楫迺遵師莊石佛諸閘北泝汶濟以
達燕冀西循曹鄆以抵梁晉濟寧州城西二十里許耐
牢坡口者實西北分路之會坡有隄綿數十里以防河
決於是時遂開通焉倘失啟閉水勢散泄漕度愆期深
為職守憂洪武二年申請于山東行省注官分任其事
南疏北導靡所寧處冬十一月省檄下委大昕相宜置
閘以為歲久計十二月朔同寅知府余芳通判胡處謙

集議率任城簿周允暨提領郭祥至於河上視其舊口則土崩流悍不可即功行視口之北幾一里許平行水滙可立基焉乃伐石轉木度工改作時水凍暫止三年二月二日集衆材合役丁夷土隄平水降八尺以為基樹以橐栗密如星布實以瓦甃迥若砥平然後鋪張木枋敷嵌石板爰琢爰鑿犬牙相入復固以灰膠闔以鐵錠磨礪剷削混然天成閘門東西廣十六尺有五寸崇十尺一寸西北比東西廣加二尺焉閘之北東向有壩

縱二十三尺西向墉縱一十五尺有奇閘之南稱是翼如也所以捍水之洄洑衝薄也兩門之中鑿渠五寸下貫萬年枋以立懸板復於閘之南北決去壅土以殺悍湍且濟舟以轉折入閘自茲啟閉有常舟行如素三月二十日告成訖功計興工至休役凡五十日以工計石工二十九人木工四人金工二人徒二百五十人以株計木一千三百有三枋五十甓大小七百八十有四鐵錠一百每錠重六斤四兩鐵斤重二百五十五木炭斤

重一千五百四十二石灰斤重六千三百四十四工之
食粟八石零七升若鐵粟則取給於官餘悉因沂克二
州任城滕鄆諸縣土地所有規措給用雖少勞於民而
民樂於趨事不費於官而官亦易於成功此大較也大
昕雖董是役而主簿周允晨夕陳力勤敏不怠其功其
勞不可蓋也遂具載本末于石以垂永久焉

重脩濟寧月河閘記略

廖

莊

吉水人大理寺卿

天順改元丁丑秋貴池孫公仁拜冬官主事奉命治水

于濟寧濟寧天井在城二閘舊有月河距州治南三里
許上口東密邇天井閘北對會通河二水縱橫若十字
然逮天雨潦溢潺湲相持什七南注其勢猶傾舟由閘
河而西者或至沈覆邇月河而上者艱於逆輓下口去
在城閘尤邇有閘瀕於西岸啟而舟下又有衝激之虞
雖善計者末如之何先是冬官主事永豐陳公律蘄陽
陳公濤繼蒞其地議以下口舊閘移入百餘尺改上口
於迤西餘七百武棄會通河不對置兩口而梁於其上

置閘於兩口之下時水盈縮而開縱之庶免前患議定
以聞詔許之工未舉孫公來代時巡撫都御史牟公富
尚以民貧財乏為難孫公乃計在官之料儲庫之積物
因其舊力省於人郡邑所供者第石灰炭而已復以聞
上可其奏而鎮守平江侯陳公豫巡河御史蘇公夔王
公祥山東布政司參政李公讚按察司僉事劉公進協
謀併智贊相為多相其事者則兗州府知府郭君鑑董
其事者則推官范君震始事于己卯之冬訖工于庚辰

之春學正陶君鼎輩咸願刻石紀成而因都督趙公輔
屬筆於予夫以天井在城二閘前人爲之備矣月河上
下二口則未備焉自前迄今皆知其不便而未如之何
今二陳啟之於前孫公成之於後經營有方措置有道
官不爲擾民不爲勞可謂克脩前人之未備便今人之
未便者矣歐陽子有云作者未始不欲長存而繼者常
至於怠廢使其繼者恒如作者之心則天下後世豈有
遺利哉故爲之記使來者尚有考而用其心也

兗州金口堰記略

劉

翊

壽光人
大學士

天下無不可為之事顧無可為之人此伊昔金口堰之
廢必抵于今而始成也堰距兗州東五里許以其障沂
泗二水入金口閘西達濟寧會通河因號今名考之後
魏及隋元以來皆嘗脩築以通漕運都之建不一堰之
興廢亦不一暨我太祖高皇帝定鼎金陵無事乎堰太
宗文皇帝駐蹕北京復通漕運而堰多事矣前此堰築
以土每夏秋之交波濤洶湧即圯無餘萬夫之役不貲

之費為之蕩然自永樂以迄于成化朝廷雖數命官脩
固卒莫能底定歲庚寅都水主事宜興張盛克謙祇承
是任肆以興復為已任乃曰與其屢費以病民孰若一
勞而永逸適冬官亞卿喬公志弘催督漕運首以白之
遂疏其實以聞上下公卿議率以為可行已而秋官亞
卿王公宗貫繼志復注意提督獎勸又得山東少參尹
公朴之僉憲王公廷言相與維持其事事駸駸乎嚮成
矣克謙結一草廬於堰側晨夕坐卧其中始終不懈財

不取于民唯以堰夫歲辦椿草折納米粟懋易一切物料躬率夫匠採石於山伐木於林煨灰於野凡百所需悉區畫有方復檄兗州同知徐福輩分司其事涓卜鳩工官使畢集興于成化七年九月訖於次年六月計堰東西長五十丈下濶三丈六尺上濶二丈八尺自地平石計五層高七尺湫口三處眎水之消長時其啟閉橫巨石為橋以便往來堰北復作分水二鴈翅二以殺水勢堰南北跌水石直五尺橫四十丈以固堰基是役也

石以片計餘三萬椿木以根計餘八萬灰以斤計餘百萬以至黃糯米鐵錠鑲木石灰合用諸料俱不下千萬夫匠二千五百有奇在公之人賞勞錢數萬緡食米千石皆克謙自所措置一毫不取于有司堰既成堅完具美規制宏壯不惟積水可以西接漕運且俾一方行者無病涉之虞于時衆方嘆克謙之不可及也後數月宗貫復巡行堰上忻羨不已爰命孔廟奎文閣典籍許節之持致仕參議劉廷振孫廷昭所所為事紀徵言夫許

景山脩蕭何故堰而成大利趙思寬脩信臣故渠而致
沃壤廣莫如海范文正築之以灌通泰深莫如洛嚴熊
穿之以溉重泉以及考亭朱子疏脩南康召陂一舉多
得皆期於必成而行者也故卒無不成此克謙所以排
衆議而不顧斷乎期於必成而後已遂勒斯言于石

埋城壩記略

商

輅

淳安人
大學士

汶泗二水齊魯名川分流南北不相通自古浮于汶者
自兗北而止浮于泗者自兗南而止元時南方貢賦之

來至濟寧舍舟陸行數百里由衛水入都至元二十年
始自濟寧開渠抵安民山引舟入濟寧陸行二百里抵
臨清入衛二十六年復自安民山開渠至臨清乃于兗
東築金口堰障泗水西南流兗北築堽城堰障汶水南
流而二水悉歸漕渠于是舟楫往來無阻因名曰會通
河我文皇帝遷都于北爰命大臣相視舊規築堰䟽渠
漕運復通第堰皆土築每遇淋漓衝決水盡泄漕渠盡
涸隨築隨決民甚苦之成化庚寅工部尚書郎張君克

謙奉命治河歷觀舊跡嘆曰以石易土可一勞永逸何
乃因循弗為經久計乎于是督夫採石首脩金口堰不
數月告成凡應用之需以一歲椿木等折納沛然有餘
曰斯堰既脩堽城堰亦不可已方度材舉事遽以言者
召還已而巡撫牟公觀其成績騰章奏保用畢前功至
則以堽城舊址河濶沙深艱于用力乃相西南八里許
其地兩岸屹立根連河中堅石縈絡比舊址隘三之一
于此置堰事半功倍遂擇癸巳九月望日興事儲財聚

料百需咸備明年春三月命工淘沙鑿底石掌平底之上甃石七級每級上縮八寸高十有一尺中置巨細石煮秫米為糜加灰以固之底廣二十五尺面用石板甃二層廣一十七尺表一十二百尺開湫口七各廣十尺高十一尺置木板啟閉遇水漲啟板聽從故道西流水退閉板障水南流以灌運河兩端逆水鴈翅二各長四十二尺順水鴈翅二各長二十五尺為分水各廣二十三尺表一百三十尺兩石際連以鐵錠石上下護以

鐵拴湫口橫巨石三四長十餘尺河舊無梁民病涉堰
成遂通車輿有元舊閘引沙入洗洗淤汶水不能入茲
堰東置閘為二洞皆廣九尺高十一尺中為分水一旁
為鴈翅二亦用板啟閉以候水消漲漲則閉板以障黃
潦消則啟板以注清流洞上覆以石石之兩旁仍甃石
高一十有八尺中實以土與地平俾水急不致南侵洗
河免于淤淤閘之南新開河九里引汶通洗河口逼崖
自顛至麓皆堅鑿堰兩閘月始通肇工于九年九月訖

工于十年十一月是役所費較之金口不啻數倍而民
不擾者以前折納外所增無幾蓋處置得宜區畫有方
所以開漕運無窮之利者實在于此都憲嘉其功之成
命克郡守錢源徵予以記往歲克謙還自東魯語及修
堰之役予心善之克謙再行予實從吏乃今績用有成
可靳於言耶昔白公穿渠民得其利歌曰衣食京師億
萬口若克謙斯堰之築漕河允賴公利兼濟視白渠之
利不尤大乎予故備書其事為記克謙名盛常之宜興

人天順庚辰進士都水員外郎

安平鎮減水石壩記

李東陽

長沙人
大學士

弘治初河徙汴北分為二支其一東下張秋鎮入漕河
與汶水合而北行六年霖雨大溢決其東岸截流徑趨
奪汶以入於海而漕河中竭南北道阻上既命都御史
臣劉大夏治厥事復特命內官監臣李興平江伯臣陳
銳總督山東兵民夫往共治之僉議胥協疏塞竝舉乃
於上流西岸疏為月河三里許塞決口九十餘丈而漕

始復通又上議䟽賈魯河孫家渡塞荊隆口黃陵岡築
兩長隄蹙水南下由徐淮故道又議以為兩隄繇亘其
遠河或失守必復至張秋為漕河憂乃相地於舊決之
南一里用近世減水壩之制植木為杙中實輒石上為
衡木著以厚板又上塹以巨石屈鐵以鍵之液糯以埴
之壩成廣袤皆十五丈又其上甃石為竇五梁而涂之
梁可引繩竇可通水俾水溢則稍殺衝蓄水涸則漕河
獲存庶幾役不重費而功可保工既告畢上更命鎮名

為安平命工部伐石勅內閣臣各紀功績臣東陽當記
竊考之治水之法疏與塞而已矣塞之說不見於經中
古以降隄堰議起往往亦以為利利與害相值必較多
寡以為重輕若毆土石當水之怒費多而利寡此古人
深戒惟水勢未迫後患尚未形周思豫制以為之備則
障之利亦不可誣况茲壩者勢若為障而實疏之故其
疏不至漏障不至激去水之害以成其利暨勞而永逸
費雖不能無而用則博矣揆之善溝者水激善防者水

淫之云者不亦兼而有之乎易象財成書陳脩和君出
其令臣宣其力雖小大勞逸不同同是道也嗚乎天下
之事莫患乎可為而不為彼宦成之怠交承之諉遺智
餘力未有不貽後日之悔者獨水也哉人無於水監當
於民監斯言也可以喻大矣唐韋丹築杆江隄實以疏
漲詔刻碑紀功著在國史臣不文謹書此為明命復

安平鎮石隄記

謝遷

餘姚人少
傳大學士

國家定鼎燕京凡上供之需百官六軍之餽餉大率仰

給東南舟楫轉輸以免陸地飛輓之勞與海運風濤之險實維漕渠是賴堯之東阿張秋鎮適居漕河之路往歲河決黃陵岡奔注張秋而渠之東隄潰決水由鹽河以入於海越歲淋漓助虐勢益悍急決口之廣至九十餘丈盡奪漕渠東注而南北舟楫幾至不通天子以為憂亟命治之遣內外重臣往總其役合山東兵民夫殫力畢作五閱月而功告成賜鎮名曰安平以示永賴於是內外重臣皆召還而山東布政司參政晉陽張公縉

嘗與董治之任效勞為多天子知其能超擢通政使司
右通政俾專理河防公益感激思奮乃諭於衆曰充當
河下流之衝自昔被患已劇今雖底寧而將來不測之
虞亦未可知隄必覷之以石庶可以障湍激之悍沙灣
石隄無恙此明驗也既而詢謀僉同鳩工集事先實土
以厚其址然後布棧疊石石必為廉隅灰液其縫每數
十丈內為階級以便登降隄外附土丈餘高突數尺以
防侵刷起自荆門驛之前邈迤而南至新建石壩以與

舊石隄接長以步計者二千二百八十有二高以層計者十有四深下要害處則加石或七八層或二三層所用木石芻灰皆出河夫歲辦工匠餼廩皆出自官不別取辦於民經始於弘治丙辰之春迄庚辰春三月而畢東阿知縣秦昂嘗與從事茲役具以告予謹記之以詔其後

建堂邑縣土橋閘記略

邱

濬

瓊山人
大學士

皇明因勝國會通河故道而深廣之通江淮漕以實京

師餘六十年于茲矣然地勢之變天時不常盡人事者
必隨時因勢一節宣之然後盡其用而利濟於無窮焉
自河決陽武潰出張秋之後朝廷既命大臣築塞之以
復其舊矣然其間猶有所壅滯之處一時任事諸臣隨
所在而爲其防備非一所也河流經東昌府之堂邑縣
境地名曰土橋其上流之牐曰梁家鄉沿而至是十有
三里下流之牐曰戴家灣汴而至是二十有八里又四
十里抵臨清之上牐漕舟至此出會通而下漳御僅七

八十里爾輒膠淤淺而不能行日集而羣聚於土橋上
下十數里間舟人叫囂推挽力殫聲嘶望而不可至主
漕計者病焉時山東按察僉事陳善專理其境之運道
議於此建牒以積水之舟屢言於上而弗見報都憲翁
世資巡撫山東所至詢民疾苦善乃以狀上公具聞諸
朝天子可之下其議於工部仍命吏部設官如常制公
得請躬蒞其處區畫事宜俾君專其事君計徒庸致才
用授其屬東昌府通判馬聰等督工即功於所謂土橋

者建石為新牓凡其規制之廣狹長短與夫疏水之渠
祠神之宇蒞事之署悉如常度經始於成化癸巳冬十
有一月之朔至明年甲午春二月告成

脩臨清州南板閘記

劉夢陽

臨清人
主事

汶水發源于泰山諸泉至汶上縣南旺湖口南北分流
為漕河南至徐沛合河沁以入淮北至臨清會衛河以
達海泉微流澁故建閘蓄縮而節用之臨清閘北流之
裔尤要焉過是則衛河承之無留行矣閘分兩河北曰

會通曰臨清則前元所建誌所謂地勢陡峻數壞舟楫者也南曰南板曰新開則本朝所建誌所謂地勢頗平往來船行者也南二閘相距甫三百方舊閘草創一以磚堰之名曰磚閘一以板障之名曰板閘繼後改為石閘易以今名日遠閼泐舟楫告艱弘治年間司徒白昂改脩會通閘導流而北閘底過卑便謝於前仍南閘以行今皇帝臨御之七載冥禎弄兵水陸途絕廷議都憲劉公總師靖醜清道通漕公抒勤脩職築亭障立保伍

士銳器精警虞剗跡時京儲垂嗇運舟逢達公於癸酉
歲春欲新南閘為利涉焉或稱截流儻功公曰詎可爾
功非數月不成何以副急餉之憂乃開北閘借便焉或
又難之公曰第為之耳以規畫授工徒疏塞濬隘下舊
河之身若干開舊河之身若干復於會通閘底沉杉九
板峻瀉既殺膠涸亦除浹為安流大往小來窮晝繼夜
南板則撤其舊而創為之新開則仍其舊而易其閘之
金口與閘之底焉掄工而工良選材而材堅趨事有嚴

布力無怠歷時告成羣如鎔冶整如截肪以是歲六月
六日工完放舟上者無號挽之勞下者無激射之險羣
吁衆異相目以嘻曰是何就績之易策算之神也蓋自
前元以至今日閘更幾作率以不能利涉為憾至是始
克免焉收効於廢變易于難識洞于隱才周於事至智
也速輸貢之程廣貨殖之用加惠兆人惠澤來裔至仁
也在昔開一渠脩一堰民興謠史載事度德量力於公
其大小久近何啻倍蓰可無紀乎用是礪石薦詞俾後

賢有考焉公名愷保定新安人

脩臨清會通閘記

徐溥

昔在太宗文皇帝肇建北京以糧運仰給東南而海運危險非長策也始改造運舟由裏河而行歲漕四百萬石以為定制歷歲既久國用給足積其贏餘不可勝計然河道自臨清以南至于徐州凡千餘里地形高下不啻數丈自前元以來置牐蓄水而舟始通在臨清境上則有會通東西二牐蓋當時開會通河引汶水由安山

歷東昌至此以入衛河故亦以會通名之永樂間初行漕法以東牐既壞嘗加脩治更六十餘年衛河益深牐益高水勢衝激益險甚為行舟之患故廢其牐者三十年于此乃弘治庚戌黃河決封邱之金龍口其流泛溢將出運河都御史錢公巡撫山東具疏言于朝下大臣議僉謂宜擇人治之母緩命刑部于左侍郎白昂以往既至督治有法而河得無事他日行視河道于齊魯間至臨清問知東牐之廢與錢公謀曰是州為汶衛交流

之地而運舟之所皆經者也。牒雖重建其可以役大而免乃協謀于巡按憲臣暨藩臬諸司檄東昌知府趙琮臨清知州張增出公錢為材用人力之費而委推官戴澄專其事。若工部郎中吳珍主事陳玉按察司副使閻仲宇皆分司其地實總督之經。始于庚戌三月至六月而工畢牒成去舊址餘百丈崇廣長闊悉如規制其深則與河等。於是水勢既平舟行上下如乘安流公私便之。夫五行皆生于天地以資人之用者也。人苟不盡裁

成輔相之道則天地雖生之而亦不適於用若夫水之潤物以行舟其用尤大者然其性本下適與土之高者相值亦惟傾而去之而反有害於人矣故後世始置為閘以節宣之乃能盡水之用而有利於天下國家也今白公當治水之際其勞已甚以其餘力復為此舉易害為利轉危為安其才真可任而不負朝廷之所託者乎凡公治水成績別有紀載此特書建牒一事故不假及云

坎河口記略

萬

恭

南昌人總
河都御史

濟水伏流至泰山溢為諸泉匯為汶北入鹽河道青州
東注于海初尚書宋公壩戴村濟源穿渠百里南注之
達于南旺以其七北會漳衛而捷于天津以其三南流
會河淮而逆諸安東皆入海青州道絕是以汶之全力
濟滕兗東臨八百里故陸地運舟而不膠然非汶之性
也其勢曷嘗一日不欲東注哉弘治中汶大溢勢不能
決戴村則潰裂而假道于坎河口坎河者入海之捷徑

也若建瓴而下南流遂微治水者議隄坎河口歲隄歲敗莫如之何則議捐南旺兩涯膏腴數千頃為蜀山馬踏南旺湖命曰水櫃以待運而坎河東注者日漸月流注南旺者幾絕隆慶壬申余治水至濟上患之乃與主事張君克文徘徊泗汶之集周覽坎河之口向張君嘆曰獨奈何不以有源者為水囊而以無源者為水櫃乎北有龍山焉亂石如魚鱗君取彼石灘坎河口則萬世計也乃役丁夫七十有奇運石湮河始于壬申之仲冬

成于癸酉之孟春灘博一里袤一里而強壓河根而上
崇丈餘秋水時至則令灘踰而瀉之復青州之故道春
夏運行則令灘止而注之入安東者趨而左入天津者
趨而右灘若天成汶失故吾蓋不能自制其命矣于是
秋不雨至于春二月閘水瀾瀾運艘繩繩張君撫膺高
蹈爲余言宜有記今後來者世守之余曰夫拂其性而
激之逆其流而役之使汶水鼎足以裂不得全其天然
吾過也吾過也然汶上濟陰湯湯淫淫孰與三分者以

濟社稷之急而紓百姓之煩痾則汶雖失全性而有全
名不顯汶神其將知我乎其將罪我乎張君乃刻石

守壩論略

張純

漕河之有戴村譬人身之咽喉也咽喉病則元氣走泄
四肢莫得而運矣昔在創建之功歲增土以培之植柳
以護之多設夫以守之其防衛蓋甚密也後土日增柳
日固則夫議停役矣所以寬民力也然物久則壞防弛
則廢即今單薄日甚原植護柳十無一二存矣況堯地

土疎汶性湍急萬一水失其性得無慮與然則為之奈何乘泉夫之餘力歲加脩築增鋪舍植新柳令見役之夫力加守護則盤錯根深壩將自固壩固將無所事節乎曰不可也彼其澎湃浩蕩之勢非有以順之則拂非有蓄之則溢拂與溢等害耳故每遇水潦須決坎河口以殺之殺之不足則開滾水壩又不足則開減水諸閘或順之入海以披其勢或蓄之入湖以納其流微則盡塞令餘波悉歸于漕是節之者固所以守之也此營衛

吐納之說也不然三汶爭趨源大流長夏秋水潦怒激奔逸豈一壩之所能支與

東平坎河口壩記

于慎行

東阿人
大學士

考之水經汶水出泰山萊蕪歷奉高嬴博之境而西過剛縣南剛縣者今之堽城又西南過章章者今之鄆城坎河之泉注之又西南過無鹽無鹽謂之須昌今為東平又西南徑壽張故城之北至安民亭入於濟則今運河西濟故瀆也蓋濟之見與伏不常而汶之西流而合

於濟則所從來久矣國家永樂中尚書宋公開會通河
始築土於坎河之西謂之戴村壩以遏其西流之道而
南出之汶上以入于運其稍逸而西出者環東平而北
承濟故瀆之支流號為大小清河以入于海則所謂鹽
渠云會通河成東兗之泉皆匯放汶泗轉注漕渠一盂
一勺民間不得有焉即稍逸而西出海王之國竊借以
行鹽筴皆漕餘瀝也而濟之名賴以存焉爾豈能與漕
爭哉歷歲滋久壩或圯墜時以全流漫衍而西夏秋伏

發南旺以北舟膠不行則漕渠病東原之田或苦羨溢膏壤畝鍾化為沮洳則民亦病是左涸漕渠右蕩平陸而以利鹽筴也海王之國歲所佐水衡少府幾何而苦東原之民以與漕爭若此乎然又有異焉障而不洩漕亦苦溢故斟酌挹損制河渠之盈虛在汶之上流耳隆慶中少司馬萬公謂汶至戴村勢如建瓴不可復收且以土為壩䟽而善潰乃上就坎河口壩以積石石如累丸沙流其下久之亦潰而坎河之功始于此萬歷丁亥

河決病漕詔簡從官行視今太僕卿常公為工科都給事中奉璽書從事與撫臺李公北河濟汶之間脉漕所由通乃奏書言臣居敬與都御史臣戴行汶上流令充郡丞東平長吏雜視畫便宜狀皆言坎河口宜為壩其法用丈計大石夾砌如壩實細石其中塗以堊珣上銳而下豐狀如魚背水高於壩漫而西出漕無溢也水卑於壩順流而南漕無涸也且居民亦不害焉臣等謹與郎中臣吳之龍主事臣蕭雍臣王元命按察使臣曹子

朝參政臣郝維喬僉事臣和震等議皆稱便大司空覆奏制曰可會御史大夫潘公復至率諸司道往閱乃檄郡邑吏營焉計築石壩長四十丈高三尺上博丈五尺下益尺六之一兩翼之長視壩減五之二厥高倍之左右為土隄丈之二百三十東岸為石隄厚一丈經始於萬歷戊子閏六月明年三月告成費凡八千金有奇諸公不自有也曰茲匪神休其克有濟乃為龍宮於上伐石紀績用示永久東平守謂行郡人請勒辭焉不佞在

里中時嘗遊章城父老指示坎河及宋公廟貌覽眺嘆
息低回不去謂先臣之於國家功若此其艱也自嘉靖
乙丑以來數治河隄潘公一與大司空朱公同開夏鎮
新渠而沂泗之間通再濬黃河築高堰以達海而河淮
之間通漕渠所患獨南旺以上時或少涸則其故在坎
河世爭言漕輓利病置此毋談何也一旦上用常公言
下詔興築潘公受而成之費不盈萬役不踰時而漕與
民兼利焉是宋公所初造疏引以制河渠之盈虛者至

是有永賴也國家歲運東南粟四百萬給中都官從泰山下陞借一錢泉水爲轉輸計不得以入濟爲解卽令岱畝之民翦蒔蓬蒿之田以爲水伯假道何辭之與哉況兼利哉夫天下事無大小操其本則易脩其末則難今世言漕渠便宜大者引河中者潴水小者疏淺不知其本在上源源之不濬而制其末流非善算也譬漏水之在壺一以爲盈而挹之一以爲涸而注之晝夜不舍無當於漏調渴烏之吻正玉虬之咽則衝渠之水可鎔

銖而稱矣何者得其本也故吾於坎河之築嘉諸公之功而幸宋公之渠有永賴焉是歲也行鹽使者亦於大小清河之間建五牐蓄水其議曰汶逸而西受之可也汶遮而南讓之可也不與漕爭汶故漕與居民既利而海王之策亦得以其全力佐少府水衡如故矣國家萬萬年之功謨畫竝出一時豈不盛哉是役也董正考成則兗州府同知陳君昌言建畫經費則東平州知州徐君銘庀材鳩工則東平判官蔡忠沂州吏目何一鵬曲

阜丞邵賓滕縣丞包揚泗水典史蔡茂魚臺典史王琮
壩成使判官汪鳳翔主之法皆得書

北河紀卷四

欽定四庫全書

北河紀卷五

明 謝肇淛 撰

河臣紀

自虞舜命伯禹作司空帝曰俞咨禹汝平水土至秦漢
有都水長丞漢武帝以都水官多乃置左右使都以領
之成帝以王延世為河隄使者哀帝初平當為鉅鹿太
守以明禹貢使行河為騎都尉領河隄晉武帝置都水

臺而河堤為都水官屬梁改都水使者為大舟卿其最
早者主舟航河隄後魏初有水衡都尉及河隄謁者都
水使者隋煬帝河渠署置令丞各一人唐因之開元中
以宇文融為九河使石晉置隄長宋置都水監黃御等
河都大提舉巡河主掃使提舉河防司元以工部尚書
為總治河防使國朝或以工部尚書侍郎侯伯都督提
督運河自濟寧分南北界或差左右通政少卿或都水
司屬又遣監察御史錦衣衛千戶等官巡視運河開泉

宣德以後遣郎中一人提督濟寧河道主事一人提督
徂徠等處泉源已而部郎罷遣以山東參政副使管理
河漕天順二年以河南道副使一員整理濟寧以北河
道成化初改命通政駐劄張秋掌衛河會通河漕政北
至天津南至魚臺一帶凡泉湖閘壩隄淺之事皆隸焉
旋以山東副使兼攝之已改都水司郎中奉勅行事凡
沿河有司及管河文武官員悉聽節制又除都水司主
事二員奉部檄行事一駐劄寧陽一駐劄濟寧掌諸泉源

閘壩之政凡有司管泉管河官員皆屬焉弘治十八年南旺別設分司以濟陽都水兼攝正德十四年專差主事一員駐劄南旺嘉靖二十四年罷遣南旺主事而以寧陽主事兼攝其政隆慶三年罷遣濟寧主事而三分司之政俱屬寧陽其臨清閘座則正德間設都水司主事一員管理嘉靖七年罷之而屬其事於甄廠然地雖分管而總理之者北河郎中也既又以濟寧東昌天津三兵備道奉勅帶管河政凡事與北河分司會議呈請

其文武官屬郡有丞判州有判縣有簿尉間有官衛有
指揮所有千百戶各守其疆不相渝越是紀稗史也不
敢以辱總督大臣爵里藩臬及府衛州縣具見郡邑志
闡官微不足錄故但具員焉而都水司郎中獨有題名
主客也

欽差總理漕運都御史一員

或兼戶部工部銜駐淮安府巡撫廬鳳淮揚

欽差總督河道都御史一員

或兼工部銜駐濟寧州

欽差巡漕兼理河道監察御史一員

歲一差

欽差巡鹽兼理河道監察御史一員

歲餘一差

欽差提督河道工部都水司郎中一員

駐張秋三年一差

欽差提督泉源兼理南旺濟寧閘座工部都水司主事

一員

舊駐寧陽今移濟寧三年一除

欽差管理甄廠兼管臨清閘座工部營繕司員外郎一

員

駐臨清三年一差

欽差漕河道副使一員

或參政僉事駐淮安府往來催趨漕糧亦視河道

欽差管理河工水利濟寧兵備道副使一員

駐濟寧州

欽差分巡東昌兵備河道副使一員

駐臨清州

欽差天津兵備河道叅政一員

或副使駐天津

兗州府運河同知一員

駐濟寧州魚臺以北至於汶上河道隸之兼管泉源

兗州府捕河通判一員

駐張秋東平以北至於陽穀河道隸之兼管張秋城池

東昌府管河通判一員

駐府城聊城以北至於德州河道隸之兼管直隸之清河縣

河間府管河通判一員

駐泊頭景州以北至於天津河道隸之

魚臺縣管河主簿一員

河道南接沛縣珠梅閘起北接濟寧南陽閘止共八十里

南陽閘官一員

濟寧州管河判官一員

河道南接魚臺界腴淺起北接濟寧衛五里淺止共六十八里

內東岸南自魯橋北至師莊三里屬鄒縣

天井閘官一員

在城閘官一員

趙村閘官一員

石佛閘官一員

新店閘官一員

仲家淺閘官一員

帶管新閘師家莊二閘

棗林閘官一員

帶管魯橋閘

濟寧衛管河指揮一員

河道南接濟寧五里淺起北接鉅野火頭灣止共二十五里

鉅野縣管河主簿一員

帶管嘉祥縣河道南接濟寧火頭灣起北接嘉祥大長溝止共

二十五里又自大長溝起北接汶上界首止共十八里屬嘉祥

寺前鋪閘官一員

通濟閘官一員

汶上縣管河主簿一員

河道南接嘉祥界首起北接東平靳家口止共七十二里

袁家口閘官一員

開河閘官一員

南旺上下閘官一員

東平州管河判官一員

河道南接汶上靳家口起北接壽張戴家廟止共三十里

靳家口閘官一員

安山閘官一員

戴家廟閘官一員

東平守禦千戶所管河百戶一員

河道南接東平馮家莊起北接東平安山

鋪止共
七里

壽張縣管河主簿一員

帶管東阿縣河道南接東平戴家廟起北接東阿沙灣止共二

十里又自沙灣起北接陽穀荆門上閘止共二十里屬東阿

陽穀縣管河主簿一員

河道南接東阿荆門上閘起北接聊城官窑口止共四十里

荆門上下閘官一員

阿城上下閘官一員

七級上下閘官一員

聊城縣管河主簿一員

河道東岸南自本縣皮家寨起北接博平棧堤止共六十里西

岸南接陽穀官窑口起北接堂邑梁家鄉止共六十五里

周家店閘官一員

帶管李海務閘

通濟橋閘官一員

永通閘官一員

平山衛管河經歷一員

河道止西岸一面南接聊城龍灣鋪起北接東昌衛冷鋪止共

三里其東昌衛河道南自真武廟起北至糧廩止共九十一丈並無鋪舍

堂邑縣管河主簿一員

河道南接聊城呂家灣起北接清平魏家灣止共三十五里

梁家鄉閘官一員

帶管土橋閘

博平縣管河典史一員

河道東岸南接聊城梭堤起北接清平減水閘止共二十七里

西岸南接清平魏家灣起北
接清平丁家口止共四十里

清平縣管河主簿一員

河道東岸南接博平減水閘起
北接臨清潘官屯止共三十九

里西岸南接堂邑幽谷洞起北接臨清潘家
橋止共三十三里內帶管德州左衛四鋪

戴家灣閘官一員

臨清州管河判官一員

汶河北岸東自潘家橋起西北
至板橋止二十里南岸東自趙

家口起西北至板橋止二十三里衛河東岸自板橋起
北接夏津趙貨郎口止三十四里西岸南自板橋起北
接清河二哥營
止三十一里

新開上閘官一員

帶管南板閘自
此以北無閘

館陶縣管河主簿一員

衛河南接元城南館陶起北接臨清南板開止共一百五十里

夏津縣管河主簿一員

河道東岸南接臨清趙貨即口起北接武城桑園止共四十六

里西岸南接清河渡口起北接武城劉家道口止共七里

清河縣管河典史一員

河道南接臨清二哥營起北接夏津渡口止共三十九里

武城縣管河主簿一員

河道東岸南接夏津桑園起北接恩縣白馬廟止共一百四十

四里西岸南接夏津王家莊起北接故城鄭家口止共一百一十四里

故城縣管河主簿一員

河道南接武城鄭家口淺起北接德州衛孟家灣淺止共六十

里

恩縣管河主簿一員

河道南接武城白馬廟起北接德州四女樹止共七十里

德州管河判官一員

河道東岸南接恩縣新開口鋪起北接德州衛張家口鋪止共五十

三里西岸南接德州衛南陽務鋪起北接德州左衛鄭家口鋪止共十五里半

德州衛管河指揮一員

河道東岸南接恩縣迴龍廟鋪起北接吳橋降民屯止共八十

四里西岸南接故城范家園止北接景州羅家口止共一百二十七里

德州左衛管河指揮一員

河道東岸南接德州耿家灣起北接德州四里屯止共三

里西岸南接德州恭張城起北接德州衛四里屯止共一里半又有四鋪在清平縣地方縣河官帶管

景州管河判官一員

河道南接德州羅家口起北接吳橋狼家口止共二十四里

吳橋縣管河典史一員

北接東岸南接德州羅家口起

德州白草窪起北接東
光王家淺止各六十里

東光縣管河主簿一員

北接東岸南接吳橋狼拾淺起

吳橋古隄淺起北接交
河白家淺止各六十里

瀋陽中屯衛管河指揮一員

北接交河劉家口止共一

里

交河縣管河主簿一員

北接青縣白洋橋止共五十里

南皮縣管河典史一員

北接天津右衛馮家口止共五十

里

河間衛管河指揮一員

河道南接交河驛北口起北接交河陳家口止共三十八里

滄州管河判官一員

河道南接天津右衛磚河淺起北接天津左衛朱家墳止共四十里

興濟縣管河典史一員

河道南接滄州安都寨起北接天津衛八里堂止共四十八里

青縣管河主簿一員

河道南接清河輓河淺起北接靜海新莊淺止共一百七十里

霸州管河同知一員

河道南接靜海長屯起北接靜海觀音堂止共三里

靜海縣管河主簿一員

河道南接青縣釣臺淺起北接天津衛稍直口止共一百三十

里

天津衛管河指揮一員

河道南接興濟蔡家淺起北接靜海泊漲淺止共六十五里

天津左衛管河指揮一員

河道南接青縣流佛寺起北接興濟張家口止共七十七

里

天津右衛管河指揮一員

河道南接南皮北馮家口起北接滄州北楊家口止共十

四里

北河都水司公署在東阿陽穀壽張三縣之交其地曰

張秋宋真宗時名景德鎮元設都水分監於此國朝弘

治七年河決張秋命都御史劉大夏等塞之因更鎮名

曰安平公署在河之西南未詳其建於何年嘉靖十四年郎中郭敦重修四十四年郎中姜國華以堂宇皆南向而公門獨折而東非居正之體乃費公帑二百金改而南門之左為坊表其右為土地神祠大門三間儀門三間大堂五間東西廊房各六間左幕廳三間右吏書房三間外廚房二間衙內上房五間東西廂房各三間左書房三間右廚房三間旁小房三間東樓五間其上有小閣三間樓前有堂五間東連房五間堂之外東西

小軒各二間外為客廳三間左右耳房各一間廳南菜園半畝許萬歷四十年二月衙房五間灾四十一年春重建

工部書院在公署之西創自弘治間為管河府佐廳嘉靖末添設捕廳於城西南隅尋革而以捕務兼屬管河通判於是移駐捕廳而河廳為廢署萬歷十六年郎中吳之龍修葺其頽圯改為工部書院凡本司新舊交代以為駐節之所近亦頽圯

南旺行署在南旺分水之傍

臨清行署在臨清州之西南萬歷四十一年以營繕分司署偪側兩易之以上二署每歲大小挑往來駐劄焉

張水工部都水司郎中題名

楊

恭

字克敬陝西岐山縣人甲申進士成化十年任加陞右通政仍管河

陳

英

字廷賢浙江鄞縣人壬辰進士成化二十三年任

吳

珍

字汝賢浙江長興縣人乙未進士弘治四年任

汪

僕

字簡之江西弋陽縣人辛丑進士弘治四年任

陳 綺 字于章浙江太平縣人戊戌進士弘治七年任

張 縉 字朝用山西陽曲縣人已丑進士弘治十年任

韓 鼎 字廷器陝西合水縣人辛丑進士弘治十四年任

商良輔 浙江淳安縣人官生弘治十八年任

錢 榮 浙江慈谿縣人進士正德元年任

田 佑 字廷相直隸贛榆縣人已丑進士正德三年任

王 溱 直隸潘縣人舉人正德五年任

李思儒 字宗正直隸高陽縣人庚戌進士正德六年任

陸應龍

字翼之直隸長洲縣人己未進士正德六年任

荀鳳

字文端直隸徐州人丙辰進士正德八年任

楊淳

字重夫陝西臨潼縣人戊辰進士正德十一年任

畢濟時

字汝霖江西貴溪縣人辛未進士正德十三年任

孔鳳

字廷瑞山東海寧州人舉人嘉靖元年任

錢瀾

字師孟直隸阜城縣人舉人嘉靖四年任

李煌

字德融江西浮梁縣人丁丑進士嘉靖六年任

李重

字子任直隸江都縣人辛巳進士嘉靖七年任

佟應龍

字師言直隸山陽縣人辛巳進士嘉靖八年任

劉守良

字君燧直隸贛榆縣人辛巳進士嘉靖十年任

郭敦

字君厚福建晉江縣人舉人嘉靖十二年任

楊旦

字啓東河南偃城縣人辛巳進士嘉靖十四年任

邵元吉

字德旋浙江餘姚縣人壬辰進士嘉靖十六年任

王廷

字仕卿四川南充縣人壬辰進士嘉靖十八年任

朱懷幹

字中正浙江歸安縣人壬辰進士嘉靖二十年任

張文鳳

字公儀直隸常熟縣人已丑進士嘉靖二十年任

歐陽烈

字懋之江西泰和縣人舉人嘉靖二十三年任

趙瀛

字文海陝西三原縣人己丑進士嘉靖二十四年任

吳崇文

字質夫河南光山縣人辛丑進士嘉靖二十五年任

嚴中

字執甫浙江餘姚縣人戊戌進士嘉靖二十七年任

沈科

字子進浙江嘉善縣人甲辰進士嘉靖三十年任

梁恩

字子承湖廣巴陵縣人甲辰進士嘉靖三十二年任

鄔璉

字宜瑩江西新昌縣人甲辰進士嘉靖三十四年任

徐九思

字子慎江西貴谿縣人舉人嘉靖三十四年任

汪

泓

字汝東直隸旌德縣人舉人嘉靖三十五年任

史朝賓

字應之福建晉江縣人丁未進士嘉靖三十八年任

王陳策

字師董直隸泰州人丁未進士嘉靖四十一年任

周望

字道見廣東東莞縣人癸丑進士嘉靖四十三年任

吳道直

字敬甫直隸定州人癸丑進士嘉靖四十三年任

姜國華

字邦直浙江慈谿縣人已未進士嘉靖四十四年任

朱茹

字以彙四川瀘州人癸丑進士嘉靖四十四年任

陳應麟

字仁卿錦衣衛籍浙江鄞縣人已未進士嘉靖四十五年任

游季勲

字英甫江西豐城縣人壬戌進士隆慶元年任

涂

淵

字時躍江西南昌縣人乙丑進士隆慶二年任

張

純

字碩恒福建漳浦縣人乙丑進士隆慶四年任

劉

泮

字汝化江都縣籍江西泰和縣人壬戌進士隆慶四年任

金學曾

字子魯浙江錢塘縣人戊辰進士隆慶六年任

汪

審

字惟幾江西弋陽縣人戊辰進士隆慶六年任

牛若愚

字思明河南祥符縣人已未進士萬歷二年任

徐

儒

字邦範江西臨川縣人乙丑進士萬歷四年任

張德夫

字子成江西浮梁縣人已丑進士萬歷七年任

屠元沐

字日新浙江嘉興縣人已丑進士萬歷八年任

顧其志

字太冲直隸長洲縣人辛未進士萬歷十一年任

郁文

字從周浙江山陰縣人丁丑進士萬歷十四年任

吳之龍

字汝陽直隸武進縣人庚辰進士萬歷十五年任

李民質

字元素直隸東明縣人癸未進士萬歷十八年任

詹在泮

字獻功浙江常山縣人丙戌進士萬歷二十年任

黃承玄

字履常浙江秀水縣人丙戌進士萬歷二十一年任

康夢相

字予賚江西泰和縣人丙戌進士萬歷二十四年任

張甲徵

字茂一山西蒲州人癸未進士萬歷二十八年任

李之藻

字振之浙江仁和縣人戊戌進士萬歷三十二年任

趙可教

字子修四川溫陵縣人壬辰進士萬歷三十三年任

施爾志

字章甫浙江嘉興縣人壬辰進士萬歷三十五年任

沈朝燦

字季彪浙江仁和縣人甲辰進士萬歷三十八年任

謝肇淛

字在杭福建長樂縣人壬辰進士萬歷四十一年任

管理北河工部郎中勅

每差一領大畧相同

皇帝勅工部郎中都水司郎中謝肇淛令爾管理靜海縣迤北而南直抵濟寧一帶河道往來提督所屬軍衛有司掌印管河併閘壩等項官員人等及時挑濬淤淺導引泉源修築隄岸務使河道疏通糧運無阻其應該出辦椿草等項錢糧俱要查照原額數目依期徵完收貯官庫以備應用出納之際仍要稽查明白毋容所司別項支用其各該管河官員務令常行巡視不許營求別差亦不許別衙門違例差遣但遇水漲衝決隄岸各照

地方即時修理如或工程浩大人力不敷量起附近軍民相兼用工事畢即行放回其南旺等處大小挑濬俱遵照近日題准事理於九月興工一應興利除害有益河道事務悉聽爾從宜區處爾仍聽總理河道都御史提督遇有地方事務呈請轉達施行若該管地方軍衛有司官員人等敢有徇私作弊賣放夫役侵欺椿草錢糧及輕忽河務不服調度併開溜淺鋪等夫工食不與徵給致誤漕運者輕則量情責罰重則拿問如律干礙

文職五品以上并軍職參奏處治事體重大及事干漕
運并撫按巡河等衙門亦要公同會議具奏定奪每年
終通將役過人夫用過錢糧修理過工程徑自造冊奏
繳其各該掌印管河文武官員賢否滿備送工部轉送
吏兵二部黜陟三年滿日差官更替如遇陞遷考滿俱
候委官至日交代明白方許離任滿受茲委用宜修職
奉公盡心經畫俾河道無阻糧運有賴斯稱任使如或
因循怠忽徒事虛文責有所歸爾其欽承之故勅

河隄謁者箴

漢崔瑗

伊昔鴻泉浩浩滔天有夏作空爰奠山川導河積石鑿
于龍門䟽為砥柱率彼河澨大陸既礙播於北野濟漯
咸順沂泗從流江淮湯湯而冀宅乃州澹菑濺東歸
于海九野孔安四隩不殆爰及周哀夏績陵遲導非其
導堙非其堙八野填淤水高民居湔湔滂汨屢決金隄
瓠子潺湲宣房作歌使臣司水敢告執河

都水分監記

元揭傒斯

會通河成之四年始建分都水分監於東阿之景德鎮掌凡河渠壩脾之政令以通朝貢漕天下實京師地高平則水疾泄故為竭以蓄之水積則立機引繩以輓其舟之下上謂之壩地下迤則水疾涸故為防以節之水溢則縋起懸版以通其舟之往來謂之脾皆置吏以司其飛輓啓閉之節而聽其訟獄焉雨潦將降則命積土壤具畚鍤以備奔軼衝射水將涸則發徒以導閼滯塞崩潰時而巡河周視以察其用命不用命而賞罰之故

監之責重以煩延祐六年秋九月河南張侯仲仁以歷
佐詹事翰林院皆能其官且周知渠事選任都水丞冬
十有一月分司東阿詔凡河渠之政毋襲故徂私毋怛
勢沮威惟宜適從敢有撓灋亂政雖天子使五品以上
以名聞其下隨以輕重論刑毋有所貸侯北自永濟渠
南至河東極汶泗之源滯疏決防凡千九百餘所咸底
於理退即以所署治文書庠冗儉陋吏側立無所爰告
於衆曰余承命來此惟恪恭是圖顧以玉丈之屋制千

里之政役徒百工何所受職下官羣吏何所聽命鄉遂之老州邑之長何所稟政荆揚兗豫數千里供億之吏何所視禁山戎島夷遐徼絕域朝貢之使何所為禮朝廷重使何所止舍乃會財於庫協謀於吏攻石伐材為堂於故署之西偏左庖右庫前列吏舍於兩廂次樹洛魏曹濮三役之肆於重門之內後置使客之館皆環拱內向外臨方池長堤隱虹又折而西達於大達高柳布陰周垣繚城遐邇縱觀嘆曰惟侯明慎周敏惟公罔私

故役大而民弗知功成而監益尊政益行斯河渠之利
永世攸賴爰稽在昔自丞相忠武王建議於江表初平
之日少監馬之貞奏功於海內一家之時自時厥後分
治於茲者鮮不著勤悼勞載於簡書而公署之役乃以
待侯侯非樂侈其居以夸其民所以正官守肅上下崇
本而立政也是役也首事於侯至之明年某月日卒事
於至治元年某月日合內外之屋餘八十楹是歲九月
記

都水行署題名碑記

邵元吉

餘姚人
工部郎中

凡公署立題名碑猶古列國乘也可以論世可以勸德
可以考政可以表年匪直為觀美已也山東河道舊隸
憲職成化間工部建議始割濟寧為南北界命郎中二
員主之賜璽書假以事權使繼憲職行事然後山東河
道與南北直隸均隸部矣郎中雖部使有憲體焉故於
官屬則司考核之權於錢糧則主稽查之籍於夫役則
酌倩調之宜於勢豪則申禁遏之例於詞訟則准受理

之典是故公考核則官屬勸矣密稽查則錢糧清矣時
情調則夫力節矣抑豪強則河道肅矣公聽斷則遐邇
咸矣出納之制則有司存徵科於州縣有司總貯於府
有司支發於掌印有司給領於佐貳有司郎中惟驗估
繩費度力信直省成計弊斯已矣是故昵官屬則比親
錢糧則褻勤惰調則煩阿豪強則設濫聽斷則妄皆自
失也故必存憲體而後可以不愧此官必自憲其身然
後可以舉憲之職否則惑也吉為此懼甫蒞任即考先

輩行事將取師焉公署舊無題名碑鮮有知者喟然曰
缺典也先儒謂名者治世脩身之具治世云者即予所
謂考政表年之類也脩身云者即予所謂論世勸德之
類也今名雖不知况望得其行事之實以資諸政事乎
予言之君子疾沒世而名不稱是不可已焉者也乃盡
閱廢卷為編年考得其職名鄉貫者若干人失其名者
一人失其鄉貫者二人究其素履始終者則間然矣歲
月若流而逝者如斯也是可慨已恭惟我國家歲漕永

賴茲河河之變凡四蓋漕河黃河相為表裏而南北河之利害不同黃河道而南則洪以南利之黃河決而北則閘以北受其害而害有二經陽阿壽張則潰出金單魚沛則淤潰以疏治疏之法以洩淤以衍治衍之法以濬斯二者先輩治有顯績可監也公署舊在河西務泊頭鎮成化以來謂潰之功難成而害最大乃令郎中駐劄茲土今黃河效靈南行順軌前之二害萬無再至但潰之害不待黃河而然近滄靜間無歲無之其勢亦能

奪流而注之海直霜降後則勢減易塞耳蓋上有汶漳
衛下流惟此河而已近雖復古四女樹絕堤小埽灣減
水間猶未足以洩百一議者欲於滄州絕堤大開支河
如茲茲地鹽河五孔橋之制或庶幾耳況黃河南北不
可期也思患而防待時而動足力而舉必有變通之術
存乎其間而非古今日之所能為也因併識以俟後之
主斯土者

北河紀卷五